



Gno barbe Rino al stâ intune biele vilute fûr dal paîs, scuasit tal mieç dai cjamps. Il so ort nol'è centât e al confine cuntun cjamp di blave.

Une sere, me agne Rose e sta cjapant sù i pomodoros ta l'ort e e à scuasit jemplât il zeî cuant che al ven fûr de blave un om. Al'è crot, come so mari lu à fat. Me agne, spaventade, e tache a zigâ e molât il zeî, e scjampe in cjase. Gno barbe, ch'al jere in cantine a travasâ, sintint il vosarili al ven sù di corse e sintût il fat, al tache a cori pa l'ort cu la forcje in man. Masse tart; il cròt al è sparît te blave.

Me agne cumò, e à pôre a là tal ort, e cjale dispès la blave, sperant che chel vergognôs nol torni.

Ancje gno barbe al'è preocupât e al sta simpri sul chi va là. Al passe un mês e il cròt al torne a fâsi viodi, ae stesse ore. Ancje 'ste volte al rive a scjampâ, prin che gno barbe lu brinchi.

Cussì barbe Rino al cjape proviodiments. Al ten il dopli a puartade di man e ogni sere al sta in vuaite, par un mês a lunc. Une sere al sint me agne ta l'ort a zigâ "Rino, Rino!". Gno barbe cu la sclope in man al cor tal ort par cori daûr al crot, ch'al jere belzà scjampât. Al tire doi colps par aiar e po al jentre di corse te blave, par cori daûr.

Corint al sint a meti in moto e cuant ch'al rive su la sgjave, al viôt slontanâsi une machine. Al tire jù une madone e al torne indaûr, rabiôs.

Prin di jentrâ te blave, a gno barbe i cole il voli suntun grum di vistîts, daûr di un baraçâr. Al va dongje e al viôt un pâr di bregons, une maiute e un pâr di mudantis.

Il cròt, pe gran pôre di cjapâ une sclopetade, al jere scjampât di corse, cence fa in timp a cjapâ sù i vistîts. Gno barbe ju cjape e ju puarte vie.

A cjase al s'inacuarç che ta sachete daûr dai bregons al'è un tacuin, cun dentri i documents dal crot.

Dai carabinieri e salte fûr che lôr a vevin il sospiet ch'al fos lui il crot ch'al veve spaurît cetantis feminis, ma cumò ch'a son sigûrs, lu metaràn a puest.

No si è plui viodût ator, il crot.

di Pauli Jacus (IV3IAN)